

Headlines

1. उपराज्यपाल मनोज सिन्हा होरें श्रीनगर नालंदा वार्ता गी सम्बोधित कीता। उ'नें आखेआ जे साहूडा मकसद ज्ञान ते अध्यात्मिकता दी विरासत च नमें सिरेया जान भरना ऐ।
2. कल मनाए जाने आले अंतराष्ट्रीय योग ध्याड़े लेई जम्मू-कश्मीर च तैयारियां जोरे-शोरें कन्नै जारी।
3. सालाना माता खीर भवानी यात्रा अज्जै थमां शुरु पैहले जत्थे गी नगरोटा थमां रवाना कीता गेआ।
4. डोडा जिले दी भद्रवाह घाटी इनें दिनें चौनें बक्खी तिलपुष्पि फुल्ले कन्नै खटोइयै इक बड़ा गै शानदार नजारा पेश करा रदी ऐ।
5. मौसम विभाग नै जम्मू-कश्मीर च 22 जून तोड़ी मौसम बदलोखड़ा बने दे रौहने ते गरज-चमक कन्नै बरखा बरने दी पेशनगोई कीती दी ऐ।

<><><><><><>

LG Sgr Nalanda Dialogue

लेफ्टिनेंट गवर्नर मनोज सिन्हा होरें अज्ज श्रीनगर-नालंदा वार्ता गी संबोधित कीता। इस मौके पर उ'नें आखेआ जे उं'दा लक्ष्य, भारत दी ज्ञान ते आध्यात्मिकता दी म्हान विरासत गी परतियै जींदा करदे होई भारत दी सभ्यतागत परंपराएं गी तगड़ा बनाना ते भविक्ख लेई समर्पित शिक्षा प्रणाली गी आकार देना ऐ जेह्डी साढे नौजवानें गी भारत दे इतिहास ते आधुनिक तकनीकें, दौनें दे कन्नै जोड़ने च मदाद करै। एल.जी होरें आखेआ जे जम्मू-कश्मीर ते नालंदा दे बुद्धिजीविएं किट्टे रलियै दुनिया दिएं सबनें शा परानी सभ्यताएं चा इक गी आकार दित्ता ऐ। उ'नें आखेआ जे एहू विरासत गै असें'गी बत्त दस्सने आहली लोऽ ऐ। श्री सिन्हा होरें गलाया जे श्रीनगर-नालंदा वार्ता, ज्ञान, दलेरी ते विकसित भारत दे नमें नजरिये दी लोऽ गी अग्गे बधाने दा इक बड़ा महत्वपूर्ण मौका ऐ।

<><><><><><>

Yoga Day Prep.

समूलचे जम्मू-कश्मीर च कल “योग दिवस” मनाने गी लेइयै त्यारियें गी मुकदा रुप देई दिता गेदा ऐ। सरकारी मैहकमे- तालीमी इदारेणें ते केंई समाजी संगठन बी जिला मुख्यालयें- पार्के- सार्वजनिक थाहरें ते एतिहासिक महत्वै आहली विरासती थाहरें पर योग शिविर लोआने जा’रदे न। एहदे इलावा पिच्छले केंइयें दिनें थमां योग दिवस मनाने दे भ्यास चलै करदे न ते माहिर योग गुरु लोकेणें गी योग दे महत्व- इसी करने दे तरीकेणें ते नियमें बारे जागरुक करदे होई भ्यास गी करा करदे न। इसै सिलसिले च अज्ज आकाशवाणी जम्मू दे बेहडे च बी इक योग शिविर लोआया गेआ। डी.डी.जी इंजीनियरिंग रवि कांता बावू हुंदी अगुआई च इस योग कार्यक्रम च स्टेशन दे बक्ख-बक्ख विभागें दे अधिकारियें ते मलाजमें बधी-चढियै हिस्सा लैता ते इक नरोआ ते खुशहाल जीन जीने लेई योग गी अपने रोजमर्रा दे जीवन दा इक अनत्रुट हिस्सा बनाने दा प्रण पाया।

<><><><><><>

Yoga Day Announcement

12में “अंतराष्ट्रीय योग दिवस” दे सिलसिले च आकाशवाणी दा क्षेत्रीय समाचार एकांश जम्मू कल 21 जून गी दपैहरी 12 बजे इक विशेष कार्यक्रम प्रसारत करने जा’रदा ऐ जेहदा विषय ऐ- “Yoga for Healthy Ageing” यानी “बधदी उम्र च योग दा महत्व”। कार्यक्रम च स्हाडे परौहने होडन- योग गुरु सुरेश गुप्ता जेहडे इस विषय दे बक्ख-बक्ख पैहलुएं पर लौऽ पागंन। इन्दे कन्नै गल्लबात करगंन स्हाडी न्यूज एंकर श्रुति खजिया।

<><><><><><>

Kheer Bhawani

श्री माता खीर भवानी हुंदी सलाना पवित्रा यात्रा अज्ज जम्मू थमां रम्भ होई- जिसले जे पैहले जत्थे गी अज्ज बडुलै नगरोटा टोल प्लाजा पर झंडी दस्सियै रवाना कीता गेआ। स्हाडे जिला संवाददाता नै जानकारी दिती ऐ कि कोई 9 ज्हार लोकेणें यात्रा करने लेई नांऽ दर्ज कराए देन ते उन्दी रमानदार यात्रा लेई 200 बस्सें दा बंदोबस्त कीता गेदा ऐ। श्रद्धालुएं गी माता खीर भवानी हुंदे दर्शनें दे इलावा कुपवाडा कुलगाम ते अनंतनाग जिले च स्थित होरनें पवित्र स्थानें पर बी लेता जाहग। प्रशासन आसेआ लोडचदे सब्बै बंदोबस्त कीते गेदे न। सलाना माता खीर भवानी मेला 22 जून गी लगगा रदा ऐ ते यात्रिएं दा 23 जून गी परतोई औने दा कार्यक्रम ऐ।

Job Fair Udhampur

नौजवानें लेई रोजगार दे मौके बधाने लेई इक महत्वपूर्ण पैहलकदमी दे तौरा पर जिला रोजगार ते परामर्श केन्द्र उधमपुर आसेआ समाज कल्याण मैहकमे दे सैहयोग कन्नै प्रधानमंत्री अनुसूचित जाति अभ्युदय योजना दे तैहत उधमपुर च इक- रोजा रोजगार मेले दा आयोजन कीता गेआ। उधमपुर दे अतिरिक्त जिला विकास आयुक्त जुगल किशोर आनंद होरें मुख परौहने दे तौरा पर इस कार्यक्रम च हिस्सा लैता- जिसले के रोजगार सरबंधी सहायक निदेशक प्रियंका गुप्ता बी इस मौके पर मौजूद हियां। इस कार्यक्रम च कुल 16 मन्ने-परमन्ने दियें कम्पनियें हिस्सा लैता- जिंदे च बक्ख-बक्ख क्षेत्रें च असामियां प्रदान कीतिआं गेइयां।

<><><><><><>

Bhaderwah Foxglove

डोडा जिले दी भद्रवाह घाटी इनें दिनें चौनें बक्खी तिलपुष्पि फुल्लें कन्नै खटोइयै इक बड़ा गै शानदार नजारा पेश करा'रदी ऐ। मन्नोपूरी घाटी पर कुसे नै इनें रंग-बिरंगें फुल्लें दी इक बड़ी चादर बछ्छाई दिती दी होऐ। तिलपुष्पि फुल्लें दा अंग्रेजी नां Foxglove ऐ। जेहदे चिट्टे गुलाबी-प्याजी ते जामनी रंगे दे फुल्ल इस घाटी दी खूबसूरती च चार-चन्न लाने दा कम्म करा करदे न ते सैलानियें लेई एह आकर्षण दा प्रमुख केन्द्र बने देन। भद्रवाह घाटी दे इक्क कोला बधियै इक्क खूबसूरत नजारा मते-मते सैलानियें गी अपनी भेठा आकर्षत करा करदा ऐ ते इनें नजारें दी पिच्छले किश अरसे दौरान मशहूरी दूरै-दूरै तगर होने कन्नै उत्थै सैलानियें दी आमद च बी उपरोतली बाद्दा होआ रदा ऐ- सैलसफा सरबंधि गतिविधियें गी बढावा थ्होआ रदा ऐ ते लोकें लेई औंदन दे नमें मौके ते जरिए बी पैदा होआ रदे न।

<><><><><><>

Med Network Ramban -SANJAY

अमरनाथ यात्रा शा पैहले रामबन च जिला सेहत मैहकमे आसेआ आपदा आली स्थिति दौरान तुरंत मदाद उपलब्ध करोआने लेई व्यापक मैडिकल नैटवर्क कायम कीता गेआ ऐ। रामबन दे सेहत मैहकमे नै राष्ट्रीय जरनैली सिडक NH-44 पर रणनीतिक तौरा पर स्थित डाक्टरें ते ऑक्सीजन बूथ सनें मैडिकल सहायता केन्द्रें च बेहतरीन स्थूलतां उपलब्ध करोआइयां न। जिला प्रशासन आसेआ लौहके अस्पताल ते आपदा आली स्थिति दौरान खून जमा करियै रखने आली

बवस्था बी ऐ ते यात्रा आले रस्ते पर जीवन रक्षक Ambulanceआं बी Standby पर रक्खिया गेदियां न।

<><><><><><>

Sanitation Workers Strike

साफ-सफाई सरबंधी वर्करें आसेआ 23एं दिनें दी लम्मी हड़ताल दे मगरा अज्जै थमां उधमपुर च साफ-सफाई सरबंधी गतिविधियां परतियै शुरु होई गेइयां जेह्दे चलदे मुकामी बसनीकें ते कारोबारिएं गी बडी बड्डी राहत हासल होई ऐ। युनियन दे नुमाइंदें ते सरकारी अधिकारिएं बश्कार होई दी गल्लबात दे बाद एहू हड़ताल खत्म करी दिती गेई। इस दरान उ'नेंगी एहू आश्वासन दिता गेआ ऐ जे उं'दिएं परानी मंगें पर प्रशासन आसेआ पक्का गै गौर कीता जाह्गा। एहू वर्कर, पिच्छले तकरीबन 3 हफ्तें थमां प्रदर्शन करा'रदे हे। इंदिएं मंगें च उ'नेंगी गी पक्का करना, बेहतर उजरत देना ते ठेके ते एन.जी.ओ आधारित रोजगार प्रणाली गी खत्म करना मुक्ख तौर पर शामिल ऐ।

इक होर दुकानदार सुरेश ने बी इस सरबंधे च अपने बचार सांझे कीते।

<><><><><><>

Weather

मौसम विभाग नै 22 जून तगर मौसम आमतौरा पर बदलोखड़ा रौहने ते केई सारी थाहरें पर इक या दो बारी बरखा पौने दी पेशगोई कीती ऐ। विभाग नै गरज-चमक, ऐन गड़ा पौने, बिजली चमकने ते धूड़ आहली अंधी चलने दी बी चेतावनी दिती ऐ।

<><><><><><>